



Notat

Dato: 14.03.2018
Arkivsak: 2016/10523-25
Saksbehandlar: Iarbirik

Til: Hans-Christian Engum

Frå: Lars Øyvind Birkenes

Trekking av motsegn - Arealdelen til kommuneplan for Kvinnherad kommune - Kulturminnepunkt

Viser til e-post datert 14.02.2018 der Hordaland fylkeskommune fekk tilsendt plankart, planforklaring og føresegner, siste versjon. I e-post av 07.03.2018 ber Kvinnherad kommune om stadfesting på at Hordaland fylkeskommune si motsegn i brev av 22.02.2017 vert trekt. Det vart i e-posten 14.02.2018 vist til at det vil bli gjort endringar fortløpande heilt fram til vedtak, og at desse kartendringane går mest på justering av byggegrensa mot sjø, samt handtering av tilhøvet mellom KPA og reguleringsplanar.

Hordaland fylkeskommune ved Fylkeskonservatoren har vurdert saka som regional styremakt for kulturminnevern.

Hordaland fylkeskommune sitt vedtak av 22.02.2017 (Utval for kultur, idrett og regional utvikling, Saknr. 26/17, møtedato 15.02.2017) der motsegn i høve til kulturminne var knytt til punkt 8, 9 og 10 er handsama på ny av Kvinnherad kommune:

8. *Alle tiltak i LNF-Spreidd område skal sendast Hordaland fylkeskommune ved Fylkeskonservatoren for vurdering i høve til potensial for funn av automatisk freda kulturminne. Det er knytt motsegn til dette punktet. Motsegn fell bort dersom dette vert teke inn i dei felles føresegnene.*

Dette punktet er teke inn i felles føresegner for LNFS under punkt 7.1.5. i kommuneplanen.

Motsegn på grunnlag av manglande føresegner på dette punktet, vedteke av Hordaland fylkeskommune i brev av 22.02.2017 fell difor bort.

9. *Der det er lagt inn nye naustføremål utan plankrav, nye småbåthamner, nye område for bruk og vern av sjø og vassdrag, samt nye eller endra bruk av akvakulturføremål skal alle tiltak sendast Hordaland fylkeskommune ved Fylkeskonservatoren og Bergens Sjøfartsmuseum for vurdering i høve til kulturminne i sjø og potensial for funn av slike. Det er knytt motsegn til dette punktet. Motsegn fell bort dersom dette vert teke inn i dei felles føresegnene.*

Dette punktet er teke inn i felles føresegner under punkt 3.9.11, 8.1.3. og 8.5.6. i kommuneplanen.

Motsegn på grunnlag av manglande føresegner på dette punktet, vedteke av Hordaland fylkeskommune i brev av 22.02.2017 fell difor bort.

10. *Det er nokre manglar i kommuneplankartet vedrørande omsynsoner for kulturminne. Opplysingar om desse er lagt ved og må rettast opp. Det er knytt motsegn til dette punktet. Motsegn fell bort når manglane er retta.*

Dette punktet er teke til fylgje og retta opp i kommuneplanen sitt arealplankart.

Motsegn på grunnlag av manglar i kommuneplankartet vedrørande omsynsoner for kulturminne, vedteke av Hordaland fylkeskommune i brev av 22.02.2017 fell difor bort.

I punkt 11 i fråsegna rådde Hordaland fylkeskommune til at Nokre LNF-spreidd område bør avgrensast eller takast heilt ut:

- a. *Austlege del av LNFS-01-07 Skarvatun, grunna tidlegare motsegn i kommunedelplan.*
- b. *LNFS-12-01 Indre Matre, reduserast nord for vegen grunna svært stort potensial for funn av automatisk freda kulturminne.*
- c. *LNFS-04-12 bør gå ut grunna nærføring til Malmanger prestegard som er freda.*
- d. *Den delen av LNSF-06-04 som omfattar Fjellandsbø bør gå ut grunna kulturlandskap og kulturmiljø.*
- e. *LNSF-15-01 på Fjellbergøy bør avgrensast slik at det ikkje omfattar den søre del av området ved Fjeldberg prestegard.*

Nokre areal for småbåthamn bør avgrensast eller takast heilt ut:

- f. *Småbåthamn Sm-03-06 bør avgrensast eller takast heilt ut grunna automatisk freda kulturminne id. 212354 og det samla kulturmiljøet. Skal det opnast for tiltak må det stillast plankrav.*
- g. *Austlege del av småbåthamn Sm-15-01 bør takast ut eller reduserast grunna nærføring til freda bygg og kulturmiljø.*

Hordaland fylkeskommune ser det som svært positivt at Kvinnherad kommune har redusert dei nemnde LNF-Spreidd områda kraftig, og også teke ut dei to områda for småbåthamn.